

Alfreider: "L obietif l é rué a nen'Euregio coi trei comuns"

Politizi e tecnizi no gioura i botons a l'encontada de Reba sul davignì del referendum. Detomas: "Difizile che la Region Veneto la mòle Cortina"



La Taula torona a Reba.

Reba - Per fè jì ennavànt el referendum dei trei comuns ladins da Souramont l'onorevol Daniel Alfreider el conscia de tò la via de pichi varese. "Per mudé i confins dela Region Trentin – Südtirol – la rebadi – vòl na lege costituzional. Ma l obietif l é

chël de rué a nen Euregio coi trei comuns ladins nte n'Europa dele Region. L assessor fasciàn Bepe Detomas: "El problema plù gran l é che el Veneto el no molarà coscita sauri Cortina." "Diesc agn dal referendum. La fin de n'illuzion?" leva

el titol de la taula torona metuda a jì da l'Union Generela dei Ladins dla Dolomites sabeda passada ntel self dei congressc de Reba. El fin: fè el pont dela situazion su co fè jì ennavànt l iter referendar davò diesc, ence ala lum dei varese ennavànt fac da Sapada e dei referendum per l'autonomia dela Region del Veneto e dela Provinzia de Belun che l é ste fat davànt en per de setemane.



Gran pert dl publich ala taula torona.

"I trei comuns i laore auna per l'unità ladina"

La sèra, che a vedù la partecipazion de na bela clapada de jent, troa ruada ence dale val ladine dintournvia, l'é stada giourida dala prescidenta de l'Union Generela Milva Mussner, che davò avei saludé duc i prejenc e chèle autorité che a dit de no cialfé a ester (ntra chisc el Capocomun de cesa Leandro Grones, chël de Ampèz

va inant a plata 3

Alfreider: "L obiectif l é rué a nen'Euregio coi trei comuns"

Politizi e tecnizi no gioura i botons a l'encontada de Reba sul davigni del referendum. Detomas: "Difizile che la Region Veneto la mòle Cortina"

va inant da la prima plata

Gianpietro Ghedina e l'president dela Lia di Comuns e Capocomun de Cianacei Silvano Parmesani l'ha recordé che "en resultat se l'arjone demé se l'é na unité de intenc". E l'ha spò peré bel i trei capicomuns da Souramont "de lascé da na pert ogni personalism e laoré auna per rué a l'unité ladina."

"Volón tourné da ulache i n'a destaché"

La moderatrice dela discusion Giulia Tasser l'ha po' passé la parola a Elsa Zardini, presidenta de l'Union dei Ladins d'Ampezz, che ntel 2007 l'eva ntel comitat del referendum. Davò avei spieghe la sua poizion a favor del referendum veneto e bolam (a Fodom la consultazion l'ha vedù le urne vuote come senn de protesta n.d.r.). La Zardini l'ha recordé e regravé chél che enlouta l'eva sté l'anima del referendum: Siro Bigotina "Titoto". "Senza de dèl - l'a dit - no se l'assa mei fat. Nte suo intervent l'a po' recordé en curt coche s'eva ruai a mète a jì el referendum. En laor scomencé co l'istituzion dela Consulta Ladina dei trei comuns che assa po' porté alla delibera per damané la consultazion. En gran laor, porté ennavan perlopiù da voluntari e jent che cherdéva nte la causa ladina e nte le rejon storiche de chise trei comuns per damané de tourné con Bolán. "Nos son sté departis contra la nostra voloné - l'ha recordé Elsa. "Nos no se sention veneti e l'nost obiectif l'é chél de tourné con chi son sté per sceol. Dèrt che l'Veneto abe sua autonomia, ma ades i a da ne dé atenzion enche nostra voloné."

"On fat cugnèsce i Ladins da Souramont nte Sùdtirol"

Piena de ricordi de chi meisce pre referendum enel intervent de Paul Videsott, un dei promodous del Comit Amic d'la Ladinia unida.

che ntel 2007 l'ava sostignù el referendum. "Co on sapù che vigniva fat chésta consultazion - a recordé Paul - on pensé che l'eva gran debuj de fè velch. Massa gran l'eva el riscio che la vade malamente come ntel prereferendum nta Fodom dei prim agn novanta, ma enche per contrasté na zerta melainformazion e chelche convinzion che l'eva da una e da l'atra pert. Tost davò l'indizion del referendum defati s'assa sentì di nte nosta val ladine e nte Sùdtirol." Ci volè chise taliagn che vol vignì a se mangé nosta tourta." E da l'atra pert, per exemple, l'eva ouc che diéva che se i trei comuns fossa ruai sot Bolán, chi che no savéva todèsc i no n'assa ciapè da laur. Per chist l'eva sté metù a jì na plata internet e mené fora material informatif. En gran laor che, se no auter, a otignù de fè cugnèsce ai abitane de Sùdtirol che enche la storia dei ladins da Souramont l'ha da Tirol e per chist a dé prò a la causa del referendum."

"Imobilism per cusion de colour politic"

Plù critic l'intervent del Capocomun da Còl Paolo Frena. "Enlouta no sonve d'acordo su la data del 28 de otobre perché l'eva massa dampò ai referendum dei comuns da chilo ju (Lamon e Souramont n.d.r.). Ma po' l'é juda polito empò." Frena l'a po' recordé i bache che el referendum dei trei comuns s'ava ciapè entamé ale rode bele davant de pié via. "Valguen ava enche contesté la legitimité che el referendum el vegne fat auna. Ma po' la Court Costituzional n'ava dé rejon. L'eva debujen spò de se muove deldut ntel terio del Costituzion." El referendum l'é sté en moment de grana unité ntra i trei comuns. Na luna de mèl che fossa durada poech. "Tost davò l'é vignù fora le difficoltà de fè sté auna le tre amministrazioni - a dit Frena. "Sa scomencé con beghe nte la Consulta Ladina demé per gauje del colour politic dei trei capicomuns. Enche per chist la Comision Intercomunale per



Elsa Zardini.



Bepe Detomas.



Daniel Alfreider.



Paul Videsott.



Milva Mussner.



Lukas Plancker.

le referendum (che ava come president l'ex assessor ampezz Stefano Verocai sostignù enche da l'enlouta grop de mendranza da Fodom de Leandro Groner n.d.r.) no l'ha fat nia. La responsabilité spò l'é d'ata dei trei comuns. Ades on el dovei de tò a mìn el mandat che n'a dé la jent. Mi - a saré ite Frena - me mète a disposizion a jì davintora se avaré la fiducia dei autri doi comuns."

"Vòl la politica dei pichi varesc"

Su la cusion del referendum l'onoevol badiot Daniel Alfreider l'a metù tost le mìn ennavant co l'i che per passé co la Region Trentin - Sùdtirol vòl na lege costituzional e no rodinaria come ntel caio de Sapada, perché l'autonomia de Bolán e Trent l'é l'ada al territorio. En modo spò per di che dut mossa ester fat ntel detam costituzional se se vòl rué a bon fin. E per chist l'a zitè el caio dela Catalogna. "Nte sti meisce l'é vedù da spò el consol de Barcelona e l'é envià a tò eemple da la situation de Sùdtirol per coche s'è ruai a nen acordo per l'autonomia. Lunesc no l'vedaré plù perché Madrid a clamé zuruch duc i funzionari de Barcelona." Da chist Alfreider a ciapè el rampin per fè en riferiment finamei ala realpolitik e ala politica dei pichi varesc del pere de l'autonomia de Sùdtirol Silvius Magnago. "Fossa en gran dann - l'a

dit - rué en Parlament col referendum ciapè en no. Toca laor a pichi varesc per rué a avei el consens de na maggioranza politica." Varesc - l'a spieghe - che ale oate po' no ester capis ma che diida prò. Come l'adejon dei trei comun al Euregio che - l'a dit - a da ester l'obietif final nten davigni de n'Euregio dele region. Bele fè rué ite i trei comuns come osservados no l'é sté en problema. E chist l'é en pivo varesc. Alfreider l'a po' spenù chelche critica sul referendum veneto. "Zaia a damané chél che d'podéva avei bele dal 2001. Chésta l'é stada demé propaganda." E sul ex Fondo Brancher l'a recordé "Co son rué a Roma ntel 2012 l'eva 180 milioni fermi sul cont de la Banca d'Italia. On metù 4 agn per i envi endavò via. Ma l'Fond per i Comuna de Confin no l'a da ester l'obietif ma demé na soluzion temporal per chise trei comuns." Solerité da envalguen domandé el deputat badiot l'a enche recordé che nte la discusion su la nuova lege per i Ladins de la Provincia de Bolán l'a "tres recordé ale plù aute enciarie del Stato da Napolitano a Gentiloni a Mattarella che l'é debujen enche de ciapè na soluzion ala cusion dei Ladins da Souramont. Ma tant - l'a n'a lasecé fora - na lege ordinaria su nen valguen cusion se po' la fè enche domandé." E su Sapada l'a dit: "La en gran sostén da pert del president del Friul Serracchiani e del Pd de Rosato ma crei che ades no la passerà, perché

en Parlament l'é demé la lege de bilanz."

"Vòl che la politica siebe auna"

Per jì plù nte la cusion giuridica a Reba l'eva sté clamé l'avoca expert de dèrt amministratif Lukas Plancker che, en gran pert, l'a confermè el debujen de fè en percors con lege costituzional. "Ma ala fin - l'a dit - dut sta nte la voloné politica. Per chist toca fè davintora en laor per paricé pò na maggioranza politica che sostén la cusion. Plancker l'a recordé po' enche el ricors che i trei comuns ava presenté ala Court Europea per i dèrt del Om perché Roma no menéva ennavant el referendum. Ricors paré endrio perché l'organism l'a da ci fè pluchester coi dèrt individui."

"Venezia no molarà sauri Cortina"

Ntel response ala domandà sul perché la Region Trentin Sùdtirol no l'abe mei fat degun at formal a favor de "Tanescion" dei trei comuns da Souramont l'assessor regional Bepe Detomas l'a responù che "chist at ala fin l'assa fat plù dann che auter. El problema vero - l'a dit - l'é che Venezia no molarà coscità sauri Cortina per dut chél che la l'porta come parada turistica e scioldi de coute." Detomas l'a buté po' en ogle ennavant. "Se Fodo, Col e Ampezz i passéss a Bolán se prejentéss el medemo problema per i ladins de Fascia (che bele davant troc agn ava prové de fè chist vare n.d.r.), perché nte la Region s'assa doi liviei de sconsanza per i medemi ladins." Per feni l'a recordé i gragn rapore de colaborazion che bele esiste coi trei comuns, ne particular col Institut Cesa de Jan, che "a come maiou sponsor proprio la Region Trentin Sùdtirol." La sira l'a saré via con envalguen intervent del pubblico, da ulache l'é vignù fora trope perplessità su le cusion politiche trate fora da chelche reladou e na gran sburla acioche i laore envere per porté ennavant el referendum. Ala fin l'Capocomun da Còl Paolo Frena l'a damané ufizialmente ai doi politizi de se tò su l'enciarie de fè aprové, tant, na lege ordinaria che diebe plù dèrc a Ladins da Souramont. (la)



N moment de la serata. Dm: la presidenta de l'Union di Ladins de Anpezo Elsa Zardini, l'capocomun da Còl Paolo Frena, l'on. Daniel Alfreider e la presidenta de la UGLD Milva Mussner.



N moment de la taula torona.